

'ի Քաղաքն Ս . եւ անդրէն դարձցին 'ի տեղիս իւրեանց
 և դրովանդակ ծախսն հոգասցեն Հայք և Յոյնք , 'ի 13 Մայիս
 ամսոյ՝ 1722 :

Իսկ Գրիգոր Պատրիարք աջակցութեամբ Հաննա վար-
 դապետի ընդարձակեաց զաւանդատունն Ս . Ստեփաննո-
 սի , կառուցեալն 'ի ժամանակս թագաւորացն Կիլիկիոյ ,
 շինեալ 'ի նմա սեղան Պատարագի յանուն Ս . Լուսաւոր-
 չին , եւ զԱւագանն Ս . առննթեր նմին՝ յօրինեալ վայե-
 լուչ և սպիտակ մարմարիոն քարամբք : Կանգնեաց սեղան
 'ի բարձր ամպիրոնն 'ի կողմն հիւսիսոյ՝ յանուն Ս . Նշանի ,
 և շինեաց 'ի վերայ սեղանոյն պահարան գեղեցիկ յոր պա-
 հէին զՍ . Խաչն , որ ունէր մասն 'ի Կենաց Փայտէն : Գնեաց
 յայլազդեաց զբազում տունն՝ և խառնեաց զնոսա 'ի վանս ,
 և պարսպեաց զնա շուրջանակի բարձր և ամուր պարսպաւ
 'ի զգուշութիւն գողոց և աւագակաց . շինեաց զբազմաթիւ
 սենեակս 'ի պէտս բնակութեան ուխտաւորաց և միաբա-
 նաց . արար և զցորենատունն՝ յորում եղեալ կայ խաչ
 մարմարիոն բերեալ յեկեղեցւոյ Յովակիմայ և Աննայի .
 նորոգեաց նաեւ զվանս Բեթղէհէմի՝ ընդարձակեալ սե-
 նեակս և զխուցս 'ի նմա , և զեկեղեցին հանդերձ ոսկեզօծ
 խաչկալօք , ժողովեալ անդ բարեկրօն միանձունս և աղօ-
 թաւորս կրօնաւորական կարգօք՝ կալ 'ի պաշտօն փառա-
 բանութեան Աստուծոյ , և աղօթս առնել վասն ամենայն
 աշխարհի և օրհնեալ աղգիս Հայոց :

Յետ այնորիկ ձեռնարկեալ նորոգեաց զվանս Յովակէի՝
 կառուցեալ 'ի նմա հաստատուն քարամբք կամարս 8 , և
 ընդարձակեաց զիլեւանս ուխտաւորաց և տեառնագրեաց
 զեկեղեցի յանուն Ս . Նիկողայոսի Հայրապետին՝ պաշտպա-
 նին նաւաւարաց . զկալուածսն՝ էր զոր գնեաց նոր 'ի նո-
 րոյ , և էր զոր 'ի գրաւէ թափեաց , որոյ ձեռնառու և օգ-
 նական էր յամենայնի նա ինքն Հաննա վարդապետ իւրով
 անխոնջ աշխատութեամբ : Այս ամենայն արձանագրեալ
 կայր 'ի վերայ դրան հոգետան Յովակէի վանաց 'ի թուին
 Հայոց 1174 (1723) , զոր անգգոյշք ոմանք բարձին զայն
 անտի : Նորոգեաց և զվանս Ս . Հրեշտակապետի՝ ծեփեալ
 սպիտակացոյց զեկեղեցին , եւ ընդարձակեաց զաւանդա-
 տունն . կանգնեալ 'ի նմա Սեղան Պատարագի յանուն